


CELEBRACIÓN EN OS COTOS (na casa)

26 – 27 de setembro do 2020

XXVI DO TEMPO ORDINARIO



NON MÁIS
VIOLENCIA
DE XÉNERO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INJUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO EN FAMILIA

SAÚDO DE BENVIDA

♪ *Andarei na presenza do Señor*

Celebrante:

Benvidos sexamos todos a esta celebración. Reunímonos para compartir a fe en familia, e facémolo no nome do Pai e do Fillo e do Espírito Santo.

As lecturas da liturxia de hoxe queren levarnos a vivir o noso compromiso cristián en dous aspectos:

- O primeiro é ser coherentes coa nosa fe, participando na tarefa de proclamar o evanxeo coa nosa vida, tendo os mesmos sentimentos de Cristo. É hora de falar menos e facer máis.

- O segundo é aprender a recoñecer os nosos erros, como fixo o fillo primeiro da parábola que hoxe nos conta Xesús no evanxeo, e ter valor para recapacitar e comezar a actuar.

Por outra parte, hoxe celébrase a Xornada Mundial do Migrante e do Refuxiado. Nunca nos esquecemos deles nas nosas celebracións, pero hoxe dun xeito especial teñamos presente a estes irmáns que buscan refuxio.

Xesús, que tamén foi migrante e refuxiado en Exipto, nos axude a ser coherentes nos nosos compromisos con todos os que teñen que abandonar e fuxir do seu fogar.

ACTO PENITENCIAL E COMPROMISOS

Celebrante: *Xesús esíxenos coherencia no noso compromiso como cristiáns coas persoas que teñen que abandonar os seus fogares por distintas causas sempre inxustas. Agora queremos pedir perdón porque non sempre nos comprometemos na defensa dos seus dereitos:*

Monitor/a

➤ Comprometémonos a vivir sendo coherentes nas palabras e nos feitos que fan evanxeo?

SÍ, COMPROMETÉMONOS

➤ Comprometémonos a vivir colaborando con todos os que se esforzan por un mundo mellor e máis xusto?

➤ SÍ, COMPROMETÉMONOS

➤ Comprometémonos a responderlle a Deus na palabra e sobre todo no facer de cada día como persoas, como familia, como parroquia?

➤ SÍ, COMPROMETÉMONOS

Celebrante: *Deus todopoderoso teña piedade de nós e dos que teñen lugar no noso corazón e nosa vida. A todos o Señor nos conceda o perdón e nos leve á vida eterna. Amén.*

ORACIÓN PROPIA DO DÍA

Celebrante: *Confiamos nas mans do Pai a nosa oración e pedimos que nos axude a ser coherentes na nosa vida para loitar por un mundo máis xusto. Lembrámonos das mulleres que malviven violencia.*

(silenzo)

Deus, Noso Pai,
ti manifestas a túa grandeza
na misericordia e no perdón.
Sigue enchéndonos sempre coa túa graza,
para que camiñemos con entusiasmo
cara os bens que nos prometes
e cheguemos a participar deles na gloria.
Pedímoscho polo mesmo Xesucristo,
Noso Señor. Amén.

2.- PROCLAMACIÓN DA PALABRA DE DEUS

(sentad@s)

Monitor/a: *San Paulo fala de unidade e de amor aos cristiáns de Filipos, pero tamén lles pon unha meta: ter os mesmos sentimentos de Xesús e “que cada quen pense humildemente que os outros son máis ca el”. Na nosa familia tamén podería ser unha meta a conseguir. Non vos parece?.*

LECTURA DA CARTA AOS FILIPENSES

Irmáns e irmás:

Así que, se vale de algo o alento que recibides en Cristo, se vos anima o amor mutuo, se hai comunión no Espírito e se hai sentimentos en vós de agarimo e misericordia, facede completa a miña alegría, levándovos ben, tendo un mesmo amor, unha soa alma, unha mesma idea. Non fagades nada á retesía nin por fachenda. Que cadaquén pense humildemente que os outros son máis ca el. Non mirar cada un polo que lle ten conta a el, senón tamén polo que llela ten ós outros.

Tede entre vós a mesma actitude de Cristo Xesús.

Palabra do Señor

♪ n° 41 *Quen nos vai separar de Ti* SALMO

(en pé) Leccionario I A páx 258 Mt 21,28-32 EVANXEO

PROCLAMACIÓN DO SANTO EVANXEO SEGUNDO MATEO

Daquela díxolle Xesús aos sumos sacerdotes e aos anciáns do pobo:

-Que vos parece?

Un home tiña dous fillos. Foi onda o primeiro, e díxolle:

-"Meu fillo, vai traballar hoxe na viña".

El respondeu:

-"Non quero"; pero despois, arrepenido, foi.

Foise onda o outro e díxolle o mesmo.

El respondeu:

-"Vou, señor"; pero non foi.

-Quen dos dous fixo a vontade do pai?

Respondéronlle:

-O primeiro.

Entón díxolles Xesús:

-Asegúrovos que os recadores e mailas prostitutas entrarán no Reino de Deus antes ca vós. Porque veu Xoán para vos ensinar o camiño da xustiza, e non lle fixestes caso; en cambio, os recadores e mailas prostitutas, si que llo fixeron. Pero vós, aínda despois de ver aquilo, nin vos arrepentistes nin crestes.

Palabra do Señor

(sentad@s) gardamos uns instantes de silencio para acoller a palabra no corazón



(en pé)

PROFESIÓN DA FE

Celebrante: *Neste encontro familiar, comprometémonos a poñerlle feitos a este credo que agora proclamamos coa PALABRA:*

Creo, Señor, pero aumenta a miña fe

Monitor/a

Credes en Deus Pai e Nai, que nos creou a todos á súa imaxe enchéndonos de amor, e que pon nas nosas mans o coidado do mundo facéndoo máis xusto cada día?

Creo, Señor, pero aumenta a miña fe

Credes en Xesús, que nos convida a ser palabras e feitos que valan a sempre a pena para os demais?

Creo, Señor, pero aumenta a miña fe

Credes no Espírito de Deus que alenta a colaborar construíndo unha sociedade na que todos somos necesarios e na que se conta con todos?

Creo, Señor, pero aumenta a miña fe

Credes na igrexa, comunidade que necesita das nosas mans, dos nosos traballos, da nosa preocupación para a acollida dos refuxiados, para sermos IGREXA de verdade?

Creo, Señor, pero aumenta a miña fe

ORACIÓN UNIVERSAL

Celebrante: *Movidos pola fe, dende a nosa casa, rezamos polos homes e mulleres que teñen que migrar e polos que viven en campos de refuxiados, e facémolo dicindo: **Axúdanos a dar unha man, Señor***

Monitor/a

- ✓ Para que, en cada un de nós, Deus atope unha persoa coherente e constante no traballo por mellorar a comunidade e o mundo, oremos
- ✓ Para que na igrexa falemos de solidariedade e a practiquemos máis, falemos de dereitos humanos e os practiquemos máis, oremos
- ✓ Para que os que traballan en organizacións polo ben de todos non perdan ánimos e atopen un sentido fondo ao seu esforzo de amor e servizo, oremos
- ✓ Que as persoas que teñen a responsabilidade de gobernar, non pechen os ollos ante a traxedia na que viven os refuxiados, oremos
- ✓ Por nós, para que nestes tempos de pandemia, sexamos responsables e coherentes coa nosa fe dando exemplo para o coidado de todo e todos, oremos

Celebrante: *Grazas Señor porque sabemos que sempre acolles as nosas preocupacións e desexos se chos pedimos con fe a Ti que vives e reinas por sempre eternamente. Amén.*

3.- OS SIGNOS DA COMUÑÓN CON DEUS EN FAMILIA

NOSO PAI

Celebrante: *Xesús fainos responsables dos nosos irmáns. Mostrémonos como fillos dun mesmo Pai rezando:*

NOSO PAI ...

SIGNO DA PAZ

Celebrante: *Só poderemos chegar á paz, se sabemos ser responsables todos, uns dos outros. Que na nosa vida sempre sexamos coherentes coas nosas obrigas de responsabilidade respecto dos demais e así fagamos a paz. Entón poderemos ser cribles e acolledores para tantas persoas que procuran refuxio.*

NON COMULGAMOS

PERO ESTAMOS EN COMUÑÓN

Celebrante: *A vida compartida do Señor lémbra-nos que o camiño de Deus é a preocupación por todos os homes e mulleres que sofren inxustiza e esquecemento.*

Nesta andaina fomos chamados a comprometernos para facer realidade o seu Reino na terra.

 ***Na tardiña baixa da vida***

4.- AVISOS E DESPEDIDA

ORACIÓN FINAL

Celebrante:

Oremos:

Señor, dámosche as grazas porque hoxe, como familia, podemos compartir a nosa fe. Sostennos sempre coa túa axuda bondadosa, para que na terra sexamos semellantes a Xesús e poidamos participar da súa gloria no ceo. Ti que vives e reinas con nós por sempre eternamente. Amén.

Que a celebración que agora rematamos nos dea azos para vivir na coherencia de procurar dignidade e xustiza en toda a nosa vida,

e nos dea tamén azos para vivir dende a tolerancia e o respecto que se merecen todos os refuxiados que se ven obrigados a fuxir das súas terras.

Que teñamos un bo día, unha boa semana, e o Señor nos bendiga, † nos garde de todo mal e nos leve ao seu fogar de vida eterna. Amén.



Asumir o compromiso cristián
 é asumilo nos feitos, non coas palabras,
 é estar dispostos a demostrar co exemplo
 o camiño de ser CRENTES E CRIBLES.



“Cal dos dous fillos cumpriu a vontade do Pai?”
 Palabras de Xesús no evanxeo de hoxe.



SEMPRE É DÍA DO MIGRANTE E REFUXIADO



Non só se
 trata de
 migrantes

medos
 caridade
 persoa
 humanidade
 non exclusión
 cidade de Deus
 os últimos serán os primeiros

En la foto: Domenico Lucano,
 Alcalde de Lamezia (Calabria, Italia)